



Nipilersortartut nipilersornikkut isertitaat B-tut nalunaarsorsinnaangortinnissaat pillugu, A-tulluunniit akileraartussatut nipilersortitsisumiit akissarsitinneqartarlutik toqqagassinneqarsinnaangornissaannut periarfissat pillugit Naalakkersuisut misissoqullugit Inatsisartut aalajangiiffigisassaattut siunnersuut. Inatsisitigit suut allanngortinneqassanersut misissuinerup qulaajassavai, qanorlu taamatut aaqqissuussinikkut allaffissornikkut aningaasatigullu kingunerissanerai takutinneqassallutik. Misissuinnerup inernera Inatsisartunut agguanneqassaaq kingusinnerpaamik UPA2023.
(Inatsisartunut ilaasortaq Aqqalu C. Jerimiassen, Atassut)
(Siullermeerneqarnera)

Inatsisartunut ilaasortamut Aqqalu C. Jeremiassenimut siunnersuummut qujanaq.

Pingaartuuvoq, nipilersortartut pitsaasunik sinaakkuteqartinnissaat, nalliuttorsionernut nuannaarnernullu pilersitsinernut tapersiisarmata.

Soorunami, isertitaqarsimagaanni, isertitamit taassuminnga akileraarummut akiliisoqassaaq. Tamatta pituttornikuuvugut akileraaruteqarnikkut ataatsimoornermut tapeeqataassalluta. Partiini innuttaasullu akornanni oqallisiginnaavarput, akileraarutitut qanoq annertutigisumik akiliisariaqarnerisugut. Assigiinngitsumimmi tassunga isumaqartoqarpoq.

Nunami inuuvugut, pisortanut akiitsoqarfiungaatsiartumi, taamaattumilluuna pingaartuuvoq, uagut qinikkatut akisussaasutut sulinissarput, akiitsut taakku qaffatsaaliornissaannut. Taamaattumik malittarisassaqarput arlalinnik, inuiaqatigiit eqqortumik akileraarutitut akiliisarnissaannut qularnaarinnittussanik. Tassa isumaqarpoq ilaatigut, aaqqissuisup nipilersortartut ilaatigooriarlutik akileraarnermut akiligassaannik uninngatitsisarnernik.

Apeqquterujussuuvorli tamanna tulluartuunersooq? Akerlianik nipilersortartup isertitat nammineq nalunaarutiginnissaat pisussaaffigisinnaangilaa?

Demokraatinut pingaartuuvoq, allannguuteqartoqassappat nipilersortartunut akornutaannginnissaa, taamaattumillu misissorneqassaaq, nipilersortartunit arlaat iluarineqarnerunersooq. Nipilersortartut allaffissornikkut kissaatiginngisaannik suliakkinngilluinnassavagut, nipilersorusunnerugunarmatami pappialalerinerningarnik.

Aningaasaqarnermut Naalakkersuisooq allannguutissatut siunnersuuteqarsimavoq, imminut suliakkerluni misissuinissaminik, pisariinnerusumik assigiissaarnerusumillu nipilersortartut eqqumiitsuliortullu isertitaminnik akileraartarsinnaanerit pisariaqartinneqarnerisooq.



Aningaasaqarnermut Naalakkersuisoq akileraartarnermut aqqissuusseqqiinissamut tunngatillugu matoqqasorujussuugaluarpog, tassungalu tunngasunik apeqqutinik akerpiassanani, taamaattumik una iluatsillugu apereqqissaanga:

Akileraartarnermut aqqissuusseqqiinissamut isumaqatiginninniarnernut qaqugu Naalakkersuisut aggersaanissartik naatsorsuutigaat?

Akileraartarnermut aqqissuusseqqiinissamut Naalakkersuisut suna angorusuppaat?

Akileraartarnermut aqqissuusseqqiinissat ilaattut suliniutit ersarissut suut Naalakkersuisut aallartissallugit eqqarsaatigaat?

Neriuppunga apeqquteqaatikka pitsaasumik ersarissumillu akineqassasut:

Taamatut oqaaseqaateqarluta siunnersuut Aningaasaqarnermut- aamma Akileraartarnermut ataatsimiititaliamit suliareqqitassatut innersuupparput.